

Il 9 da fevrer: Sontga Apollonia ni Balugna, purschala e martira



Sontga Apollonia fuva bein buca pli giuvna, cura ch'ella ei vegnida marterisada. Naschida eis ella en Alexandria da nobla e reha famiglia. Da pign ensi eis ella vegnida educada bein per survir a Diu ed esser misericordeivla culs paupers. Ella ha buca vuliu semaridar ed ei restada purschala retratga en ina casa ordeifer il marcau d'Alexandria. Ella deva a tuts exempel da mintga vertid e spendeva ses dis cun gignar, savens urar e buca mo cun tener ils condaments da Diu, mobein era ses divins cussegl.

Da quei temps deva ei en Alexandria in striun, in grond inimitg dils cristians. Sin ina piazza publica ha quel, sco sch'el fuss in profet dalla scola nera, detg ch'ei vegni sur da tut il pievel in grond castitg, nua ch'ils cristians vegnien mazzai, damai ch'els seigien inimitgs dils dieus. Cun far tala tschontscha ha el stigau ils pagauns encunter ils cristians. Quels mavan tut ravgiai casa per casa dils cristians, prendeva tut quei ch'era surviu e devastavan tut igl auter. La gliעד cartenta vegneva mazzada cun da tuttas sorts marteris.

Sontga Balugna veva di per di in particular desideri dad era saver dar la veta per amur da Diu. Perquei sepreparava ella cun far ferventamein oraziun ed exercezis spirituals. Ina damaun va ella el marcau sin quella piazza, nua ch'il derschader pagaun truava alla mort enzacons cristians. La sontga purschala ha per in mument mirau tier, ei serecumandada a Diu e cun cor generus turzegiau il derschader ch'el temi buca il Diu, signur e Retg dils retgs e turmenti e mazzi quels che temien e surveschien a quei sulet ver Diu. Il derschader sesmarveglia da tonta curascha e vul saver tgi ch'ella seigi.

Balugna rispunda cun aulta vusch: Jeu sun Apollonia, ina cristiana, survienta da Jesus Cristus. Jeu smarvegliel fetg sur da tia crudeivladad e tschoccadad. Ti sbettas il ver Diu, honoreschas ils demunis e mudregias ils vers cartents. Tras questa risposta ei il tiran staus stridaus e fatg dar fermas schlaffadas sin la fatscha ch'ils dents ballucavan, la bucca unflava ed ils eglis vegnevan blaus. Ord bucca e nas curreva il saung. Lura ha il tiran dumandau: Nua ei tiu Diu che havess da liberar tei da quellas peinas? Confessa uss che ti hagues plidau ignorant ed jeu perdunel e vi buca schar mudergiar tei vinavon. La purschala rispunda: O ti scroc, valanuot! Vul far dir manzognas mei. Jeu hai gia detg che jeu seigi ina survienta da Cristus e sco cristiana sai jeu buca dir manzognas. Ed en verdad, per grazia da Diu sentel jeu buca tias peinas.

Ravgiaus ed ord tutta fuorma camonda il ruh derschader als ministers da prender crappa e rumper ora ils dents a Balugna sch'ella snegi e blastemi buca il cristianisem. Ils ministers han furiusamein smaccaa la crappa denter las missialas, sfraccaa ora ad ella tut ils dents e maltractau il tgau dalla sontga martira. Duront quei urava la sontga e rugava Diu ch'el dueigi duvra ella da far misericordia cun tut quels che recuessien tier ella enten endirar semegliantas dolurs. Tal rugar ha Diu tedlau ed ina vusch da tschiel ha rispundiu: O spusa da Cristus, tia oraziun ei vegnida exaudida. Il tiran che vesa che las peinas pon buca far effect, lai envidar in grond fiug e smanatscha da barschar ella viva ni ch'ella snegi Cristus ed aduri ils

dieus dils pagauns. La sontga sedeclara prompta da murir per amur da Cristus tgei mort ch'ei tucchi. Sin quei vegn ella menada ord il marcau tiel fiug cun aunc inaga dar la letga da blastemar Cristus ni da vegnir ligiada e barschada viva. La sontga purschala damonda empau temps, sco sch'ella less patertgar tgei far, mo drova quei temps per urar. Ella serecamonda a Diu, vegn grondamein scaldada cun amur divina e taluisa rinforzada ch'ella veva negina tema dalla mort. Tut anetgamein eis ella mitschada ord ils mauns dils hentgers e sezza seglida el fiug culs mauns alzai encunter tschiel. Il tgierp ei barschaus e l'olma ei sgulada en la bratscha da siu divin spus Jesus Cristus ils 9 da fevrer digl onn 252 sut igl imperatur Decius.

Ils pagauns pudevan buca sesmarvigliar avunda ch'ina dunna da otgonta onns hagi tonta curascha da suffierer tal marteri ch'els sezs sesnuevan da mirar tier. Ils cristians ludavan Diu che veva dau tonta forza a sia survienta e rimnavan las restonzas da siu sogn tgierp e cunzun ils dents. Quels ein vegni purtai en differentas baselgias per ch'ils cristifideivels sappien venerar la sontga purschala Balugna. Zun biars che ein serecumandai a sontga Balugna, han leu retschiert particular agid e vegni deliberai dil mal ils dents.

Reflexiun

Gronda generusadad e fermezia ei stada quella d'ina sontga Apollonia ni Balugna. Tgi vess cartiu ch'ina dunna da circa 80 onns vessi tonta curascha? Mo la viva cardientscha, l'amur per Jesus Cristus, il spért per defender la sontga cardientscha e la grazia divina pon e dattan fermezia al fleivel. Tut quei pren naven la tema dil mund e fa il cor surventscheivels per endirar ils turments.

Lein pia mirar che nossa cardientscha resti viva e che nus veien era la vera amur per Jesus Cristus. Fussen nus paregiai da pitir ton per amur da nies divin Spindrader? Gie, pign interess e schliatas pissiuns ein savens ovras che fan bandunar Cristus e lain suandar il demuni e sacrificar nies agen salit. O vergugna e schan per in cristifideivel ch'ei buca semegliants a sontga Balugna, mobein a Giudas Iscariot! Ribad. Croiset.